

Ny Valosoa sy hadihady

Tsy misy mangirana ny fiainam-bahoaka **Anjakan'ny mafia ny sehatra maro eto amin'ny firenena**

Tena tsy mazava intsony na tsy misy vola ao amin'ny kitapombolam-panjakana, ka tonga amin'ny lazaina fa tsy mahaloa vola intsony (en cessation de paiement), na ataon'izao fitondrana izao tari-drano an-kilahila ny fitantanam-bola, ka ny vohodinkodina no betsaka, ary ny tena zava-doza dia anjakan'ny mafia tanteraka ny sehatra maro eto amin'ny firenena, ka tsy misy mangirana intsony ny fiainam-bahoaka. Ny antony mahatonga ny hametrahana ireo mety ho fototry ny tsy fahafahan'izao fitondrana izao manefa ny troso mitatao eo ambony lohany. Efa aman-taonany no vita ny fanamboaran-dalana nataon'ireo mpandraharaha nandray an-tànana izany kanefa dia arirariran'izao fitondrana izao amin'ny filazana, fa misy asa mbola tsy vita na mbola misy fanadihadiana atao noho ny faktiora tsy misy entana naterina, sns,... Amin'izao fotoana izao dia tsy mandray vatsim-pianarana ny mpianatra eny amin'ny ambaratonga ambony ary ailika amin'ny tekonolojia "digitalisation" tsy voafehy ny rihitra ka, angamba, lany nanakaramana ireo mpisehatra amin'ity teknika vaovao fandoavam-bola ity ny vola. Azo antoka anefa fa tsy maintsy misy ampahany mipitika ho an'izay nanome ny asa ny tetibola natokana ho amin'izany. Vao omaly koa no nitokona ireo mpianatra ho mpitsabo (internes) satria tsy mba nisitraka ny fampikarana ny karama 13% toy ny mpiasam-panjakana rehetra, satria angamba tsy noheverin'ny mpitondra ho anisan'ny mahazo izany izy ireo. Ny olana anefa dia ny marary na ny manana havana marary eny amin'ny toeram-pitsaboana, hopitaly na CSB, no sahirana rehefa tsy miasa ireto "internes" ireto. Ananan'ny Ministeran'ny Fahasalalam-bahoaka ny lisitr'izy ireo ary azo antoka fa misy izany koa any amin'ny Minsiteran'ny Fitantanam-bola, ka tokony handeha ho azy ny fison-drotana. Vao ny andro faharoan'ny fanadinana BEPC, ny talata lasa teo, dia nitokona tsy nety nitsara ny taratasim-panadinana ireo mpampianatra satria tsy mbola nisitraka ny tambin-karamany (vaca-

tion) tamin'ny taon-dasa. Ny mampametra-panontana nana ny maro dia efa tafiditra ao amin'ny tetibolan'ny Ministeran'ny Fanabeazam-pirenena isan-taona izany tambin-karama izany, kanefa dia nanjavona tsy fantatra tamin'ny fomba ahoana, satria tsy vao izao no nisy tranga toy izao. Orinasam-pirenena toy ireo manana ny sata mitovy aminy ny orinasa SECREN, ka bankiropitra toy ny Air Mad sy ny Sirama, nitaraina ny mpiasa ao ny herinandro lasa teo fa tsy nandray karama tato anatin'ny dimy volana. Farahidin'ny ny mpiasa ka tsy manambola hamidy sakafo, tsy manambola hampianarana ny zanany sy hitsaboan-tena, tsy manam-bola handoavana hofantrano, ka tsy fantatra intsony na lasa nihodina aiza indray ny vola tokony ho nandoavana ny karaman'ireto mpiasa ireto. Ka ny fanontaniana mipetraka dia misy mpanambola mety handray itony orinasa itony toy ny anaovana ny Air Mad, ka nasosoka ao ny Madagascar Airlines ve, na toy ny Jirama izay manofa "générateurs" amin'ny orinasa tsy miankina ve ? Mampanahy ihany koa ny mety halehan'ny "subvention" dimanjato miliara ariary omena ny Jirama satria tsy mazava mihitsy ny fitantanam-bolan'izao fitondrana izao. Alaim-panahy ny maro hilaza fa ny vola rehetra tokony handoavana ireo "troso" rehetra ireo dia mety lasa any amin'ny "paradis fiscal", satria raha mivadika ny toe-draharaha dia misidina any fotsiny ny henjana rehetra satria efa manana ny vonona. Araka ny vaovao farany ary namafisin'ny mpandraharaha iray avy any amin'ny Faritra Sava dia tena manambaka ny tantsaha mpamboly lavanila mihitsy ireo manao ampihimamba, satria raha dimy arivo sy fitoalina ariary no hividianana ny iray kilao dia efa mananika ny roa tapitrisa ariary anefa no hividianan'ireo mpividy izany any Eô-rôpa. Tsy mahagaga raha niakatr'afao ny solombavambahoaka voafidy tany Toamasina I momba ity resaka lavanila ity.

Andy Tsiavalona

Kaominina Ivato **Mitohy ny ezaka fanamboarana foto-drafitrasam-bahoaka**

Mitohy hatrany amin'izao fotoana ny fanamboarana foto-drafitrasam-bahoaka ataon'ny ao amin'ny kaominina Ivato distrikan'Ambohidratrimo, tarihan'ny ben'ny tanàna Penjy Randrianarisoa, voafidy tamin'ny anaran'ny antoko Tiako i Madagasikara (TIM). Afak'omaly, nisy ny fitsidihana ny fahavitan'ny fatsakanan' Andrianampoinimerina tao amin'ny Fokontany K2 nataon'ny Ben'ny tanàna, Penjy Randrianarisoa niaraka tamin'ny Solombavab-



Ny ben'ny tanànan'Ivato (afavoany manao solomaso), nijery ny zava-bita tao amin'ny fokontany K2, ao amin'ity kaominina ity.

hoakan' i Madagasikara, voafidy tao Ambohidratrimo, Johnny Rakotoari-

soa. Teo koa ny fijerena ny elakelatrano izay nahahirana ny mponina, in-

drindra rehefa fotoam- pahavaratra. Vita beton tsara izany ankehitriny. Faly sy nankasitrika izany ny mponina ary mbola manantena ny hitohizan' ny asa miaraka amin'ny Ben'ny tanàna, Penjy Randrianarisoa izy ireo. Ankoatra izany, nahazo jiro cobra manazava ny lalana avy amin'ny Jirama, sy ny ministeran'ny angôvo koa ny kaominina Ivato, napetraka avy hatrany koa ireo jiro fanazavana ny tanàna ireo.

Stefa

Angôvo **24 ora mahery tsy nisy jiro sy rano ny tany Morondava**

Raha 12 ora ihany hatramin'izay ny fahatapanan' ny jiro teto amin'ny renivohitry ny faritra Menabe, tapaka tanteraka izany ny alatsinainy tamin'ny 7 ora hariva ary tsy niverina raha tsy ny talata tamin'ny 9 ora alina araky fanazavana azo moa dia lany tanteraka ny solika tao amin'ny Jirama, izay tsara ho marihina fa mbola ny Jirama ao Antsirabe no mitantana ny Jirama aty Morondava. Saharina ny

vahoaka, indrindra fa tamin'ny fitadiavana rano satria dia vitsy ihany ny manana lava-drano eto Morondava, ka feno bidon mavo eraky ny lalana handeha hitady rano. Maty antoka koa ireo mpanangona hazandrano satria tsy nisy ny glace, nitobaka eran'ny tsena ny fia (trondro), izay voatery namidy mora. Ny tompon' andraikitra tsy nisy nahanoana feo raha tsy efa nandeha ny jiro, fa izay



Feno tanàna ny bidon jaune ny alatsinainy sy talata teo tany Morondava.

nanontaniana dia milaza fa miandry toromarika izay vao afaka miteny.

Rajepa

TANORA TIM ANTANANARIVO FAHA-6 **Mikarakara Faradoboka maimaimpoana momba ny fanadinana bacc**

Toy ny isan-taona amin'ny fotoam-panadinana toy izao, manomanana famerenana Faradoboka ho an'ireo hanala ny fanadinam-panjakana bakalôrea (bacc) ny Tanora TIM ao Antananarivo faha-6 Ambohimanarina. Nanomboka ny alatsinainy 4 jolay 2022 izany Faradoboka Clé du BACC 2022 izany, izay maimaimpoana. Andiany faha-5 ity asa sosialy izay fanaon'ny Tanora Tim Tana VI ity, tarihan'i Lalaina Rabezahary eny Ambohimanarina isan-taona. Tanora mpianatra miisa 100 eo no misitraka izany tamin'ity taona ity.

Isambilo



Ireo tanora mpianatra, miatrika Faradoboka amin'ny fandinana bacc eny Ambohimanarina.

7000000

ANTSO HO AN'NY MPANAKANTO

Miantso anao ry mpanakanto, mba meteza ho tonga saina F'efa toa kamboty isika, lavi-dravy sy reny mpiahy. Ireo natao hianteharana, eny ireo izay nantenaina No indro fa mandroba anao ka mifanahin-jiolahy !

Ny maha-ianao anao mihitsy no efa toa tsy asianny vidiny, Fa dia tena hoe izay tiany no tereny hotanterahina. Ampy izay ny toetra ratsiny, ampy izay ny sain'angidy, Ndeha sokafy anio ny maso fa tsy jamba ianao na pahina !

Izay mba mampiray antsika no aoka harindra sy halanto, F'aza faly ny hisolelaka ka hanohana andry boboka. Olona afaka tanteraka izany atao hoe mpanakanto. Tsy mba ny olona "mpijapy", vetivety dia hijoboka !

Amin'ny maha- mpanakanto dia ny tsara no aoka hatolotra, F'aza faly hahazo vola dia hanitsaka ny namana. Zavakanto dia tsy miaraka amin'ny halatra sy tsolotra Ary koa ny mpanakanto dia tsy " bitro fanandramana" !

Zay mba maha-malagasy no hevero sy asandrato, F'efa potika tanteraky ny resa-politika. Aoka tsy ho vilam-bava nefa tia mitari-bato, Na sokajin'ny bemolotra tia ny mampizara antsika !

IRINA HO TAFITA (02-07-22)

NY VALOSO
Gazety misochintelo isan-karimandro
VAOVAO
(Telata - Alakamisy - Jobatny)

Dokam - barotra

Tel. 034 79 076 00

gvalosoa@yahoo.com